

廬

山

集附英溪集

三

欽定四庫全書

廬山集卷五

宋 董嗣杲

撰

七言律詩

秋巖自山中見約

九江驛裏見春風幾度懷清隔曉鐘思白有人傷柳色
依劉無地感浮蹤半生力學羞長劍兩載心期信短筇
九疊屏高有標致遠公相約則吾從

棠梨湖

西城轉地有湖光
矮矮荆榛出土岡
俎豆零星傳野哭
舳艫聯絡急邊防
夾壕楊柳猶秋色
貼屋桃花自晚粧
芳草不除生意在
此名誰命謾華堂

泊接泥渡

笑泊虛寒古渡沙
沉暉遠襯楚山霞
江鄉酒薄難支日
客路詩多轉憶家
金彈耀林懸橘柚
翠綃縈浦泛蘼葭
船窓掩定身如石
籬落何人有菊花

又晚立接泥渡邊

逍遙行樂立西風多聽秋聲耳欲聾供世難分心力異
浮家易感古今同小花糝渡遺晴蓼碎葉填津積冷楓
博望有槎撐不去岸頭橫卧樹心空

東林寺上方塔

塵外乾坤豈易窺上方尋勝短筇隨病僧借榻山衣破
卧佛當門石塔危亂竹迸階交密樹荒苔沿壁纏疎枝
幅巾居士修行久愛說浮光死戰時

蘄城晚泊值雪

鴈聲哀怨極淮天際晚驚呼雪打船古驛魚稀誰撒網
虛沙馬過自隨鞭人烟頑獷空多智形勝丘墟又幾年
龍眼磯頭風浪惡今宵歸興此方堅

壬戌元日二首

青燈挑雨曉光凝歲律回壬萬象新心上痛懷松里友
客中忍視茗山春誰橫烟竹驚孤旅自飲屠蘇笑八神
摺起朝衣羞老去驅車猶冒路歧塵

萬里東風起楚皋流年祇染鬢蕭騷富池江口聽春雨

昭勇樓心看雪濤薄俗苦無公可論全身惟有隱方高
故山猿鶴應相笑抗走殊鄉實自勞

富池客中寄范約庄

客子驚秋易斷魂江塘落葉雨紛紛蔽江雲勢山頭合
隔竹泉聲屋尾分無日不宜閒問酒有懷猶且強搗文
燈窓幾憶同居話卷裏新篇可得聞

寄楊雲靜

公藉椒塗成達宦我傳草檄守清貧閒曹奔走徒云仕

薄俸沾濡不逮親飲水曲肱無此量解衣推食有何人
涼風四壁蛩新咽偏惱淹回獨客身

東林寺贈宜上人

幽階苔蘚翠纖纖屐齒沾濡逐步黏曉澗迸泉迷杏塢
春風停雨暗茅簷禪高何待音聲悟詩好爭傳格律嚴
誰挽我師重主社社中休更外陶潛

寄冷翠谷葛秋巖

入眼萬欲勇舍難巖頭飄盡楓葉丹心憎湓浦戶庭熱

身入廬峯毛骨寒塵面只掬野泉洗醉吟且呈泥佛看
幾多清話動人憶夢落成圍蒼竹竿

鏡禪人欲歸靈隱

袈裟裹定老禪翁雲隔家鄉是幾重兩面廬山曾徧覽
三生天竺會相逢搖涼竹簟收江羽醒困茶甌淪建龍
午借客床尋偃息不知身在紫霄峯

贈羅漢院志遠上人

披緇受業在淮南不覺流年七十三羅漢院中餘古栢

金定四庫全書
卷五
將軍墳上落枯杉纏綿宿病逢奇藥收拾頽年坐破龕
自說舊樓真佛境羅田山裏毒龍潭

江城與秋巖同賦

江柳青青暗古津悲歌不獨是商人愁生獨醉重關晚
夢破相思故國春聲迹衰遲難應世山林枯朽易全身
歸期渺邈徒懷想怨鳥花梢叫月頻

蒙叟悟禪人俗舍在湖口縣予留江城聞其歸
省且有書貺因寄二首

要識間棲彼此輕平江浪遠暮帆晴青春晚處羈懷惡
白髮生時老眼明花落無心尋笑傲客鄉有日苦逢迎
雲色尚寄雙鍾下若過吾廬祇半程

富池歸去欲相從幾想蒼雲碧樹東夜月庾樓懷抱在
春風陶徑夢魂通前峯路斷鋤犁少古渡征苛網罟空
難語數年牢落恨千林如海夕陽紅

留江城

灌城眠食嘆羈身憑曉偏驚索鏡心南紀山川秋望遠

西湖風月夜懷深功名鬼妬投機罕詩酒天嗔絕侶尋
陳跡自應遲料事斷鴻信杳况雲陰

贈封禺山翁

鷓鴣鳴雨鶴吟風可羨山中白髮翁百事不聞天地閉
四憲常見水煙空春時聚社尋屠伯晴晝科書授學童
此外惟知安分去鹿門真隱畧相同

淫祀

水泛牌頭五里亭尚留破廟壓空垆松蘿陰覆鴉羣怪

里社聲傳土偶靈
幡裊歌竿三丈赤
溪分荒藻數叢青
頭陀強解愚夫卜
瓶缶花香帶肉腥

寓江州西城

奔忙夢落富池程
歸托遽廬戀濯城
有石醉乘新月坐
無家吟逐亂雲行
衣遺母線寒針在
燒起公山晚陣鳴
鄰屋酒香堪洗恨
擬栽松菊傲淵明

暑中訪平山坦上人

遙遙殊積入山心
勇涉湖西且解襟
當暑行松探古跡

追涼踏蘚入晴林
信知淨境無三伏
猶幸慳囊有幾金
白酒青衣隨所遇
此來祇爲此僧尋

思歸

秋老江城起戍塵
山收西日掩雲津
留連光景多無酒
俛仰風埃獨有身
曠野鴈填遺陣闊
虛沙船發落痕新
故園松菊猶三逕
夢過煙霞水石鄰

晚過張分司園

偶乘意度過東鄰
芳艷多情媚柳津
歡笑直邀雲際月

酣歌狂惜雨餘春
亭臺花木銷官酒
城郭風煙老客身
回首廬山圖畫裏
不知愁落軟紅塵

題瀛溪書院

遠徑溪流自圓光
風霽月渺無邊
窻前生意休除草
堂上清風獨愛蓮
萬古共知歸有極
一塵不染見先天
未知涵味其中者
誰是元翁得正傳

登庾樓

重支瘦竹上危樓
涼襲綸巾羽扇秋
天地江山風浪起

汀洲蘆荻水煙浮誰聽調夜琵琶苦擬泛吟秋舴艋遊
喚得元規魂夢醒何妨小作踞床留

千年傳說庾公遊遠戍秋塵障兩眸往事未知誰可語
今朝聊復此登樓淮山鳥去衝烟滅楚澤帆歸帶日收
閒客望窮江北晚月明無賴幾沙洲

顧城

初聞春日水天迷此際湖沙擁岸肥炊甑有塵糝米腐
酒坊無壁紙旗飛猿棲曉樹青藤瘦雀啄冬畦白菜稀

寂寞旅懷禁得否
斷腔漁笛釣船歸

新橋遇秋巖

出郭看山眼便醒
故人相值說雲萍
了翁屋後晚煙碧
茂叔阡頭秋草青
絕壑雨過溪水響
高峯月上谷雲停
烏巾漉酒菊花店
醉揀陶詩書紙屏

富池客中

捨舟遵陸幾程來
家事身謀兩未諧
九地渺茫憐骨肉
四方軒豁暢襟懷
雨翻茶嶼春離岳
風颭旗曉渡淮

短景不延愁思遠只堪長醉向茅柴

舟上食菜粥甚美

莫望池口浪接天羈懷沉迷衾枕前老船蕩雪櫓聲澁
破釜煮粥蔬味便烟鎖淮俗子城下風生野坊僧樹巔
懶能登岸躡寒屐因數杖頭無百錢

冷翠閣與秋巖同賦

笑携琴冊上崑崙分坐溪頭蘚石根崖樹有霜飛老葉
野泉無雨落秋痕幾番閒借樵人屐何許追尋隱者門